



Komunikadu Imprensa
7 Agostu 2018

**Grupu Advokasia Sosiedade Sivíl Servisu ba Asuntu Inestu hasoru-malu ho Sekretáriu
Estadu ba Igualdade no Inkluzau**

Iha 7 Agostu 2018, Grupu Advokasia Sosiedade Sivíl Servisu ba Asuntu Inestu (Grupu Advokasia) hasoru-malu ho Sekretáriu Estadu ba Igualdade no Inkluzau (SEII), Exelénsia Sra. Maria José da Fonseca de Jesus, iha Obrigado Barack-Dili, atu apresenta hanoin no preukupasaun sira relaciona ho kazu inestu iha Timor-Leste.

Sorumutu ne'e, ho objetivu atu apresenta JSMP no ALFeLa nia submisaun kona-ba "Hadiak Kódigu Penál atu proteze diak liu fetu no labarik.

"Grupu Advokasia ne'e hasoru malu ho Exelénsia Sekretáriu Estadu ba Igualdade no Inkluzau atu apresenta dados, esforsu no preukupasaun sira kona-ba kazu inestu ne'ebé kontinua aumenta no esplora ospaun alternativa atu responde ba situasaun ne'e liuhosi alterasaun ba Kódigu Penál atuál, dehan Diretør Ezekutivu JSMP, Luis de Oliveira Sampaio.

Iha sorumutu ne'e, grupu advokasia ne'e reprezenta hosi responsavel organizaun ida-idak apresenta faktus no realidade bazeia ba esperensia hosi kada instituisaun ida-idak banhira halo akompañamentu ba vítima sira hosi kazu inestu sira. JSMP apresenta ninia deskobrementu sira hosi tinan 2012 to Maiu 2018 ne'ebé rejista kazu inestu 49, ALFeLA apresenta ninia servisu asisténsia legál ba vítima inestu sira, PRADET apresenta dezafiu sira no hanoin kona-ba importánsia ba kriminaliza inestu no Fokupers mós subliña nesesidae atu kriminaliza inestu bazeia esperensia kazu sira ne'ebé Fokupers akompañia.

Aleinde ne'e grupu ne'e mós apresenta kona-ba esforsu no aprosimasaun sira ne'ebé grupu servisu ne'e halo ona durante ne'e. Porezemplu apresenta ona preukupasaun sira ne'e ba instituisaun relevante sira hanesan PN no Governu atu konsidera oinsa bele responde ba situasaun ne'e liuhosi alterasaun ba Kodigu Penál hodi inklui artigu espesifiku atu kriminaliza inestu.

Audiénsia ne'e hetan reajem pozitivu husi Exelénsia Sekretaria Estadu ba Igualdade no Inkluzau no simu ho haksolok ideia no inisitiva ne'ebé apresenta hosi grupu advokasia sosiedade sivíl no promete katak sei koalia asuntu ne'e ba instituisaun relevante sira seluk liu-liu ho Ministru Justisa. Sekretariu Estadu mós sei husu tan informasaun adisionál seluk bainhira presiza grupu ne'e ninia ajuda.

Iha parte seluk Diretór Jerál SEII Sr. Armando da Costa haktuir katak presija duni artigu espesifiku iha Kódigu Penál ne'ebé koalia kona-ba inestu, tanba iha Kódigu Sivíl haktuir katak grau segundu la bele hola malu (kaben) nune'e iha ona interpretasaun ne'ebé diferente.

Sorumutu ne'e taka ho entrega relatóriu ne'ebé JSMP lansa iha tinan 2012 ho titlu: Inestu krime ida ne'ebé la hetan rekoñesementu no submisaun kona-ba "Hadiak Kódigu Penál atu proteze diak liu fetu no labarik," no rezume sira kona-ba artigu sira relasaun ho kazu inestu ne'ebé problemátiku no presiza altera.

Tuir planu audiénsia hanesan sei halo mós ho Exelénsia Ministra Solidaridade Sosial. Grupu Advokasia ne'e kompostu hosi organizasaun sira hanesan ALFeLA, Fokupers, Acbit, Pradet, ALola Foundation, Ba Futuru, Mane ho Vizaun Foun, JSMP no Casa-vida.

Atu hetan informasaun liutan bele kontaktu ba:

Luis de Oliveira Sampaio
Diretór Ezekutivu JSMP
E-mail: luis@jsmp.tl
www.jsmp.tl